

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 399166 21 St
Tuzla, 15.07.2021. godine

Uprava Općinskog suda u Tuzli
UI. ZAVNOBiH-a bb., Tuzla

Dostavljamo Vam Oglas o otvaranju prethodnog postupka nad dužnikom „**DELIX**“ d.o.o. **Doboj Istok**, Mala Brijesnica bb., Doboj Istok, radi objave na web stranici Općinskog suda Tuzli, shodno članu 61. stav 5. Zakona o stečaju (Sl. novine F BiH 53/21).

O G L A S

OPĆINSKI SUD U TUZLI, sudija Arnaut Faruk, u postupku prethodnog ispitivanja prijave za pokretanje stečajnog postupka nad dužnikom „**DELIX**“ d.o.o. **Doboj Istok**, Mala Brijesnica bb., Doboj Istok, dana 15.07.2021. godine donio je sljedeće:

RJEŠENJE

POKREĆE SE PRETHODNI POSTUPAK radi utvrđivanja uslova za otvaranje stečajnog postupka nad imovinom privrednog društva „**DELIX**“ d.o.o. **Doboj Istok**, Mala Brijesnica bb., Doboj Istok.

Za privremenog stečajnog upravnika imenuje Alisa Bijedić iz Tuzle.

Privremeni stečajni upravnik dužan je odmah po prijemu rješenja o imenovanju preduzeti radnje utvrđene odredbom člana 16. Zakona o stečajnom postupku, a naročito:

- **obezbijediti imovinu dužnika i starati se o istoj,**
- **ima ovlašćenja da uđe u poslovne prostorije dužnik i provede neophodne radnje,**
- **utvrditi da li postoji razlog za otvaranje stečajnog postupka,**
- **ispitati da li će imovina stečajnog dužnika pokriti troškove stečajnog postupka,**
- **utvrditi da li se poslovanje stečajnog dužnika može u cjelini ili djelimično nastaviti u toku prethodnog postupka i**
- **uraditi kontrolu poslovanja stečajnog dužnika.**

Privremeni stečajni upravnik dužan je podnijeti svoj pismeni izvještaj ovom sudu u roku od 30 dana od dana donošenja ovog rješenja u kome će izvijestiti ovaj sud o preduzetim radnjama

i iznijeti svoje stručno mišljenje o tome da li postoje razlozi za otvaranje stečajnog postupka, odnosno da li postoje bilo kakvi izgledi za nastavak daljeg poslovanja dužnika.

Mjere pojedinačnog prinudnog izvršenja pokrenute protiv stečajnog dužnika se obustavljaju, izlučna i razlučna prava povjerioci ne mogu ostvariti u predhodnom postupku, stečajni dužnik ne može raspolagati budućom stečajnom masom bez saglasnosti privremenog stečajnog upravnika i suda, a sve to u cilju osiguranja buduće stečajne mase.

Rješenje će biti objavljeno u „Službenim novinama F BiH“, web stranici Općinskog suda u Tuzli i na Internet stranici FIA-e te se pozivaju povjerioci da privremenom stečajnom upravniku bez odlaganja dostave prijedlog mjera osiguranja na predmetima stečajnog dužnika koje će eventualno zahtijevati.

Ovo rješenje će se dostaviti Odjeljenju registra ovog Suda, Zemljišno-knjižnom uredu Općinskog suda u Gračanici i Službi za geodetske i imovinsko-pravne poslove Općine Doboj Istok, radi upisa zabilježbe otvaranja prethodnog postupka.

O b r a z l o ž e n j e

Predlagač kao dužnik i Intesa SanPaolo Banka d.d. BiH podnijeli su dana 07.04.2021. godine ovom sudu prijedlog za otvaranje stečajnog postupka nad ovim privrednim društvom, zbog platežne nesposobnosti stečajnog dužnika.

Stečajni sudija nakon što je utvrdio da je prijedlog za pokretanje stečajnog postupka podnesen od strane ovlaštenog predlagača u smislu odredbe člana 4. stav 1. Zakona o stečajnom postupku i da je isti dopušten dana 05.07.2021. godine, naložio je predlagaču da uplati novčana sredstva na ime predujma finansiranja troškova prethodnog postupka radi utvrđivanja uslova otvaranja stečajnog postupka.

Predlagač Intesa SanPaolo Banka je dana 15.07.2021. godine dostavio sudu dokaz o uplati predujmljenih sredstava za finansiranje prethodnog postupka u iznosu od 6.000,00 KM.

Na osnovu priložene dokumentacije i to: aktuelnog izvoda iz sudskog registra od 26.04.2021. godine; bilansa stanja na dan 31.12.2020. godine; bilansa uspjeha za period od 01.01.2020. godine do 31.12.2020. godine; uvjerenja o registraciji obveznika poreza na dodanu vrijednost od 11.11.2005. godine; uvjerenja o poreznoj registraciji od 01.06.2010. godine i pregleda rješenja prinudne naplate Intesa SanPaolo Banke d.d. BiH od dana 05.04.2021. godine, predlagač je učinio vjerovatnim platežnu nesposobnost.

Na ročištu za saslušanje stečajnog dužnika održanog dana 05.07.2021. godine, zakonski zastupnik društva Belkić Muharem izjavio je da u cijelosti ostaje kod prijedloga za otvaranje stečajnog postupka nad imovinom društva „DELIX“ d.o.o. Doboj Istok, navodeći iz razloga što ne postoje dalji ekonomski uvjeti za rad društva zbog nesolventnosti, a zbog nepostojanja imovine društva nije moguće kroz postupak likvidacije dovesti u situaciju dođe do brisanja privrednog subjekta iz registra privrednih društava. Zbog navedenog podnesen je stečajni prijedlog te u pogledu obaveza društva ističe da što se tiče obaveza društvo je dužno značajne iznose prema dobavljačima i bankama, kako to stoji u prijedlogu na dan podnošenja, tačnije sa danom 05.04.2021. godine okvirno se dugovao iznos od 841.373,45 KM koji iznos je zasigurno sada značajno veći. Računi

društva su u blokadama po osnovu podnesenih prijedloga za izvršenje od strane povjerilaca, kao dobavljača, zatim banaka i državnih institucija po osnovu neplaćenih direktnih i indirektnih poreza. Od imovine društvo ima poslovni objekat sa zemljištem (poslovna hala) te je ista pod hipotekom, upisanom u korist Intesa SanPaolo Bank kao povjerioca založnog prvog isplatnog reda. Društvo posjeduje prevozna sredstva kojima se vršila osnovna djelatnost, odnosno teretna motorna vozila koja su u određenom dijelu sa zasnovanim založnim pravima na pokretnostima upisanim u Registru zaloga. Društvo ma određena potraživanja čija bi se visina i mogućnosti naplate istih mogla utvrditi u daljoj fazi ovog postupka, a nakon što privremeni stečajni upravnik, a zatim i stečajni upravnik utvrdi stvarno stanje kod dužnika po osnovu poslovne dokumentacije i druge dokumentacije koju bi koristio za vođenje ovog postupka. Sama hala sa teretnim motornim vozilima koja se nalaze u krugu iste, obezbjeđena je na način da je objekat ograđen i zaključan pristupnom kapijom na koju se ulazi u prostor hale i radi pristupa teretnih motornih vozila. Društvo je ostalo dužno za 15 uposlenih radnika plate u bruto iznosima za 3. i 4. mjesec 2021. godine, a i ovo bi se preciznije utvrdilo u nalazu i mišljenu privremenog stečajnog upravnika.

Na osnovu podnesene dokumentacije i zakonskog zastupnika stečajnog dužnika, sud nije u mogućnosti da sam procijeni postojanje svih neophodnih uslova koje Zakon predviđa za otvaranje stečajnog postupka, te se donosi rješenje o pokretanju prethodnog postupka radi utvrđivanja uslova za otvaranje stečajnog postupka nad dužnikom, temeljem odredbe člana 61. stav 1. Zakona o stečaju („Sl. novine F BiH“, br.53/2021.).

Odluka iz stava 3. ovog rješenja donesena je temeljem odredbe člana 63. Zakona o stečaju, a nakon što je utvrđeno da privremeni stečajni upravnik ispunjava uslove za imenovanje utvrđene odredbom člana 71. Zakona o stečaju.

Na osnovu navedenog, temeljem citiranih odredbi zakona, sud je odlučio kao u izreci rješenja.

SUDIJA
Faruk Arnaut

POUKA O PRAVNOM LIJEKU: Protiv ovog rješenja dozvoljena je žalba u roku od 8 (osam) dana, računajući od dana objavljivanja. Žalbu mogu uložiti stečajni dužnik i privremeni stečajni upravnik. Žalba se podnosi Kantonalnom sudu putem ovog Suda.